

桐山老農集

關山老屋集

桐山老農集

四庫全書珍本初集
別集部
類部

詳校官檢討臣德生

中書臣劉源溥覆勘

欽定四庫全書

集部五

桐山老農集

別集類四元

提要

臣等謹按桐山老農集四卷元魯貞撰貞字

起元自號桐山老農開化人集中萬青軒記
自稱曲阜人蓋曲阜其祖貫也貞生當元末
明初是集中文作於元者皆題至正年號其
入明以後惟題甲子有粟里抗節之思焉凡

文三卷詩一卷詩不出元末之格且間有累句蓋非所長其文亦聞見頗狹或失考正如武安王廟記迎神詞中有蘭佩下兮桂旗揚乘赤兔兮從周倉句考周倉之名不見史傳是直以委巷俚語鐫刻金石殊乖大雅然人品既高胸懷夷曠一切塵容俗狀無由入其筆端故稱臆而談自饒清韻譬諸深山幽谷老柏蒼松雖不中繩規而天然有出塵之意

其故正不在語言文字間矣乾隆四十三年

六月恭校上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

總校官進士臣繆琪

校對官中書臣李奎

謄錄監生臣謝大倫

欽定四庫全書

桐山老農集卷一

元 魯貞 撰

記

江山修學復田記

天生斯民不能以自治也故生聖人以治之聖人不能以獨治也故設官以養而教之建后稷教之稼穡以養其生而升其俊秀於學建學校以明人倫使復其性而

貢其賢能於王當是之時升於學者不使耕也而凡庸
不與焉則養之得其人也教之於學者必先王之道而
異端不與焉則教之得其道也由是大道明焉異端息
焉風化成焉人材出焉三代聖王所以盡夫代天子民
之責者其在此矣自秦以來若漢之文景海內富庶屢
賜民租知養民矣而不知養士也若唐之太宗大召名
儒增廣生員知養士矣而不知教也迨宋河南二程子
倡明正學紫陽朱子又發揮之然後聖人之道晦而復

明昭若日月知所教矣而當時不知用也是以大道泯而異端起風俗薄而人材靡迨及我朝上自京師下至州縣莫不有學學有生徒有廩膳而又表章程朱之學以為教於天下則其養與教豈不超乎唐宋而追蹤三代歟江山為縣在衢上游學在縣之西舊有田若干為豪民據者十之二所入微而養士之資有所不給至正六年監縣多爾濟侯來視學事怪生徒之不集也教諭劉奎進曰田奪於豪民故無以為養也侯於是召鄭

明等而語之俾復其田未幾詹侯來尹斯邑遂力追復之於是鄭明周子顏等歸田四十五畝魚塘蔬圃不與是數而學之廩遂豐明年郡人周撫新主學事請曰棟宇欹撓楹桷頽彫風雨震撼之朝夕若不能支詹侯喟然嘆曰此吾事也乃即咨之邑長蘇賚滿而悉之邑士鄭文明周德屋及聞侯之言欣然助之又率邑之士民出鉶供役於是撤朽易新去缺更全塗之以黝堊補之以磚瓦講誦之室庖湑之所凡學之具各有所葺理乃

命教諭招集生員邑之羣彥森然來萃廩之以所復之
租克然而足而是邑之士始得其養矣遂明先王之道
以教之其書易詩書春秋子史百家其理仁義禮智信
其事君臣父子夫婦日用之間誦讀以習之思慮以通
之晝為而宵得瞬養而息存而是學之士始得其教矣
友人徐君來道詹侯之事求為之記辭不獲嘗記今年
春貞游江山時見其諸山雄壯怪石突起衡雲疑其必
有卓然之士特立勁氣與山石相盪摩者及至其學讀

朱子所為二記然後知賢哲之生不偶然也又疑朱子所謂深藏不市者豈至於今未之見邪然今不異於古安知其不生於朱子之時而生於今日也邑之群士既得所養則相與服侯之教益勵於學而山石蘊畜之氣將必有所泄矣豈非教化大行而人材由是出焉然則詹侯之功不可忘也是宜為記詹侯名道愈字齊之好學而文所至有善政武夷人也

蒼崖記

予性好山水嘗欲得僻地負山面溪卜居其間以自適而未能一日程仲武來語予曰參今歲假館廣信之玉邑南山南山東山曰東青有大坂皆田也北曰據山山半有古人飲馬池旁有松林高際天翠入雲霄之上居之者朱德華也德華之曾大父敬軒先生前宋之鄉貢進士也居前有溪東來北去停青涵碧有舟可漁有纓可濯得山水之勝矣德華嘗因仲武求予記之昔東漢公理居有良田廣宅背山臨流者其若是歟唐李愿居

盤谷宅幽而勢阻者又若是歟予雖未見南山勝槩而
仲武之來者三遂想像而為之記予嘗與仲武之兄仲
原約遊少華其時當一觀也又為歌曰蒼兮縈兮草木
之青青峻兮嶒兮石罅之層層草木之青青山之青也
石罅之層層山之厓也厓之上子之居之有琴有書歌
斯聚斯蒙帝力而不知厓之西有田一方兮子其農之
種之有酒一盛兮子其福之告之忘人世之盛衰優兮
遊兮其無憂兮休兮留兮其無求兮安得化予之兩臂

以為羽乘風以行覽南山之勝槩以契予所好於平生
桐山老農魯貞記

萬青軒記

予避亂之九年歲在庚子始結屋于梧板之平安塢以
居四圍皆山也因名之曰萬青一元之氣行乎宇宙之
間節而為四曰春夏秋冬春於行屬木於色為青於人
為仁山之青青者木也色也生氣之周流乎四時者仁
也吾嘗燕坐乎是室中前有椿桂榿枌後有松栢杉檜